

দেশে আড়াই কোটিরও বেশি মানুষ নিরক্ষর

আন্তর্জাতিক সাক্ষরতা দিবস আজ

■ নিজামুল হক

২০১৪ সালের মধ্যে দেশকে নিরক্ষরমুক্ত করার ঘোষণা দিয়েছিল প্রাথমিক ও গণশিক্ষা মন্ত্রণালয়। কিন্তু বাস্তবতা হলো ২০১৫ সালেও এ হার মাত্র ৬৪ দশমিক ৬ শতাংশ। ২০১১ সালে এ হার ছিল ৫৮ দশমিক ৮ শতাংশ। সে হিসাবে গত ৫ বছরে সাক্ষরতার হার বেড়েছে ৬ শতাংশ। আর জনসংখ্যা বিবেচনায় এখনও আড়াই কোটির বেশি মানুষ নিরক্ষর। এমন বাস্তবতার মধ্যেই বিশ্বের অন্যান্য দেশের মতো বাংলাদেশেও আজ পালিত হচ্ছে আন্তর্জাতিক সাক্ষরতা দিবস।

প্রাথমিক ও গণশিক্ষামন্ত্রী মোস্তাফিজুর রহমান গতকাল দাবি করেছেন, দেশে এখন সাক্ষরতার হার ৭১ শতাংশ। ২০১৩ সালে অনুষ্ঠিত প্রাথমিক ও গণশিক্ষা মন্ত্রণালয়ের এক সংবাদ সম্মেলনে জানানো হয়েছিল, দেশে সাক্ষরতার হার প্রায় ৭১ ভাগ। সে হিসেবে গত ৪ বছরে সাক্ষরতার হার বাড়েনি।

বাংলাদেশ পরিসংখ্যান ব্যুরোর তথ্য অনুযায়ী, ২০১৫ সালের হিসেবে ১৫ বছরের বেশি বয়সী পুরুষের সাক্ষরতার হার ৬৭ দশমিক ৬ শতাংশ। আর নারীদের এ হার ৬১ দশমিক ৬ শতাংশ। এছাড়া ৭ বছরের বেশি বয়সীদের সাক্ষরতার হার ৬৩ দশমিক ৬ শতাংশ। এর মধ্যে ছেলেদের সাক্ষরতার হার ৬৫ দশমিক ৬ শতাংশ এবং মেয়েদের এ হার ৬১ দশমিক ৬ শতাংশ। ২০১১ সালে ৭ বছরের বেশি বয়সীদের সাক্ষরতার হার ছিল ৫৫ দশমিক ৮ শতাংশ। সংশ্লিষ্টরা বলছেন, দেশকে নিরক্ষরমুক্ত করার জন্য সরকারি ও বেসরকারি সংস্থাগুলো কাজ করছে। কিন্তু সে অনুযায়ী সাক্ষরতার হার বাড়ছে না।

মন্ত্রণালয় সূত্রে জানা গেছে, দেশে সাক্ষরতা বিস্তার, অব্যাহত শিক্ষার আওতায় দক্ষতা উন্নয়ন প্রশিক্ষণ প্রদান এবং জীবনব্যাপী শিক্ষার প্রসার ঘটানোর মাধ্যমে মানব সম্পদ উন্নয়নের জন্য 'উপানুষ্ঠানিক শিক্ষা আইন ২০১৪' হয়েছে। এছাড়া 'উপানুষ্ঠানিক শিক্ষানীতি ২০০৬' ও 'জাতীয় শিক্ষানীতি ২০১০' এ সবার জন্য শিক্ষা লক্ষ্যমাত্রা অর্জন তথা দেশকে নিরক্ষরমুক্ত করার ওপর গুরুত্ব দেয়া হয়েছে। বর্তমানে ৪৫ লাখ বয়স্ক নিরক্ষরদের সাক্ষর জ্ঞান দেওয়ার জন্য তিন বছর মেয়াদি ৫৫২ কোটি টাকার একটি প্রকল্প গ্রহণ করা হয়েছে।

আজ বৃহস্পতিবার আন্তর্জাতিক সাক্ষরতা দিবস। দিবসটি উপলক্ষে আজ সকাল সাড়ে ৭টায় কেন্দ্রীয় শহীদ মিনার থেকে ওসমানী স্মৃতি মিলনায়তন পর্যন্ত বর্ণাঢ্য র্যালির আয়োজন করা হয়েছে বলে জানিয়েছেন প্রাথমিক ও গণশিক্ষামন্ত্রী মোস্তাফিজুর রহমান।

এ উপলক্ষে গতকাল বুধবার সচিবালয়ে মন্ত্রণালয়ের সভা কক্ষে আয়োজিত সংবাদ সম্মেলনে মোস্তাফিজুর রহমান বলেন, ওসমানী স্মৃতি মিলনায়তনে আয়োজিত অনুষ্ঠানে প্রধান অতিথি থাকবেন প্রধানমন্ত্রী শেখ হাসিনা।